


Sel Prestuhn
Thomas S. Monson



Pwacye nuh ke Luhlahlfongi luhn Pahpah Tuhmasr

John Linford el yac 43 ke pacl se el ac muhtwacn kiyacl, Maria, ac tolu sin tuhlihk mukul nahtuhlos orwacalah sulaclah in som liki lohm selos Gravely, England, in fuhfahsryucsr ke tausin mael in ohsun nuh sin Mwet Luhlahlfongi ke fahlfahl Great Salt Lake ah. Elos som sahyacn mukul ahkakhosr nahtuhlos, suc kuhlwcansap ke misin, kuhkwackuhnlah ma lalos, ac fuhfahsryucsr ut Liverpool ac oacyak ke oak soko *Thornton*.

Fuhfahsryucsr fin kof nuh New York City, ac nuh Iowa, ahkkahlwemyeyuck tiac yohk srihpac. Mwe sensen uh muhtwacwacack, tuhsruhk, pacl fototo tohkoh Linfords ac kuhtuh Mwet Luhlahlfongi suc wi kalkal ke *Thornton* som liki acn Iowa City ke Julaha 15, 1856, pa sie ip tiac wo ke un handcart luhn James G. Willie ac.

Puhlan pacl upac ac fuhfahsryucsr sensen sang elyah yohk ke orekma laltahl, weluhlwcng John. Sahflahiyac sikyak tuh el arlacna mas ac muhnahs oruh el enenuh in utuck ke handcart ah. Ke pacl se u sac sun acn Wyoming, kuhiyac kahlwem na pwacye lah muhnahtah. U in molwe-lah se fin acn Salt Lake ai ke Ohktohpah 21, ao na tukun fuhfahsryucsr in ikoac lal John sahflah ah. El misac ke lotutacng se ingacn apkuhran nuh Infacel Sweetwater ah.

Kuh John el puhla ahsor ke el sang moniyuck ac ahk-fihsracsrye ke mwe srihke, ma enenuh, ac ma upac in us sucu lal nuh fin acn Saion?

“Moh, Maria,” el fahk nuh sin muhtwacn kiyacl met liki na el misac ah. “Nga engan lah kuht tuhkuh. Nga fah tiacna moul in sun acn Salt Lake, tuhsruhk kom ac tuhlihk mukul an ac sun, ac nga tiacna auli ke ma nuhkewewa kuht fahfahsruh kac fin tuhlihk mukul nahtuhr uh kuh in kapkapwack ac tuhfhlah sucu lalos uh ke Saion.”¹

Maria ac wen nahtuhl ah ahksahfyelah fuhfahsryucsr lalos. Ke Maria el misac pakuhran in yac 30 tohkoh, el ac John esamyucki ke sie mwe sang ke luhlahlfongi, ke kuhlwacnsap, ke moniyuck, ac ke kihsackuhnlah.

In ekihn sie Mwet Luhlahlfongi ke lwen-sahflah pa in sie payonir, tuh kalmacn payonir pa “sie suc som met in ahkolah kuh ikucslah inkacnek nuh sin mwet sahyah in ukwe.”² Ac in ekihn sie payonir pa in akihlenyuck ke kih-sackuhnlah uh. Finne mempucr ke Alu uh tiac sifil siyuck-yuck in som liki lohm selos uh in oruh fuhfahsryucsr nuh Saion uh, elos kwacna enenuh in fihliyac ohiyac mahtuh, facsin ke pacl somlah, ac luhngse kawuck lalos. Kuhtuh oraclah sulaclah elyah in som liki mwet ke sucu lalos suc tiac insese nuh ke mempucrlac lalos ke Alu uh. Mwet Luhlahlfongi ke Lwen-sahflah uh fahsr na nuh met, tuhsruhk, pruhe tuh elos suc sacohk fah kahlwem kac ac insese.

Inkacnek luhn sie payonir tiac fihsrwacs, tuhsruhk kuht ukwe falcken niyac sahflah luhn Payonir—finne Mwet Lahngo—suc som met, ahkkahlwemye nuh sesr inkacnek in ukwe.

“Fahsru fahsr tukuk,”³ El suli.

“Nga pa inkacnek, ac pwaye, ac moul,”⁴ El fahkwack.

“Tuku nu yuruk.”⁵ El pang.

Sie inkacnek kuh in srihkeyuck. Kuhtuh upackihn in kutong isrucnyuck ac sramsram in ahkkoluk luhn mwet lahlfon ma ahkkolukye moul nwacsnwacs, orekma suwohs, ac ahkostwen nuh ke masap luhn God uh. Facluh nuhkuh muh wacngihn srihpac in ahkostwen nuh ke ip yohk uh. Ke suhpweyuck Noah in muhsahi soko oak ah, mwet lahlfon pucspucs liye nwacsnwacsiyacn kuhsrao na isrucn ac lwesrihk—ne ke na af ah tuhkuh.

Fin acn Macrike ke pacl loeloes somlah ah, mwet uh suhlahlalfongi, tahfuh luo, ac seahkos nuh ke sie e fuhrreack Zarahemla, facluh afuhnlah Moronihah, ac kof uh raunwelah acn Moroni. Ahksruhksruh, ahkkoluk, ahksrihkyactwen, ac koluk uh tuh wacngihnlac. Ma inge tuh ayaollac ke puhsra na mihslac, lohsmahntol. Mong-fihswacs luhn God wacngihnlac, pacl Lal fohnlah.

Tiacna wacngihnlac luhlalfongi lal Maria Linford finne ma upac fin acn England, upac ke fuhfahsryucsr lal nuh ke acn se suc God . . . El ahkolah,”⁶ ac sikyak ke mwe srihke el muhtwacnglah luhn sucu lal ac ke Alu uh.

Ke sie tuhkwani in ahkkahlwemye ke kuclyuck in mwe acsmakihn lal Maria ke 1937 ah, Elder George Albert Smith (1870–1951) el siyuck sin fihl nahtuhl: “Yac kowos fah moul pwacye nuh sin mwet luhlalfongi mahtuh lowos? . . . Oruh insacnwacng in fal nuh ke kihsac nuh-kwewa [elos] oraclah nuh suwos.”⁷

Ke kuht suk in muhsahi Saion ke insiyacsr, ke lohm sesr, ke mura lasr, ac ke acn sesr uh, lwelah kuht in esam ke insacnwacng puhlaik ac luhlalfongi sahflah lalos suc sang kwewa kuhiyaclos kuht in muh kuh in engankihn mwe insewowa ke fohlohkyak luhn wasasuc uh, wi fin-srak la ac wuhlwelah ke Iwacclah luhn Jisus Kraist.

MWE KAHSRUH

1. Liye Andrew D. Olsen, *The Price We Paid* (2006), 45–46, 136–37.
2. *The Compact Edition of the Oxford English Dictionary* (1971), “pioneer.”
3. Luke 18:22.
4. John 14:6.
5. John 7:37; oacyacpac liye 3 Nephi 9:22.
6. Liye “Fahsruh Mwet Wo,” *Hymns*, no. 30.
7. Liye Olsen, *The Price We Paid*, 203–4.

LUTI KE PWENG SE INGE

Nuhnkuh in siyuck selos suc kom luti in nuhnkuh ke mwet in moul lalos suc wacngihnlac met ac oacna payonir nuh selos an. Na siyuck selos ke pacl elos ke ekihn payonir se ac ahkolah inkacnek luhn mwet sahyac uh. Solwaclos in nuhnkuh ke kihtin pacl ma elos enenuh in kihsackuhnlah ac efuh yohk srihpac. Na kom kuh in srihkaclac in suhmuhslah fahkwack luhlalfongi lalos ke “kuhiyacn Payonir uh,” pa Mwet Lahngo.

MWET FUHSR

Pwacye ke Luhlalfongi Lalos

Prestuhn Monson el sruhmuhn sramsram soko ke sie sucu payonir na tahfuh puhsracl Prestuhn George

Albert Smith: “Yac kowos fah moul pwacye nuh sin mwet mahtuh luhlalfongi lowos uh? . . . Insacnwacng in moul nwacsnwacs ke kwewana kihsac [elos] orwacclah nuh sum.” Lah kom ekihn sie payonir in fihl lom kuh fihl se emet ke fihl ke mempucr ke Alu uh, kuh kom liye ke mwe srihkasrak ke luhlalfongi in mwe kol ac ahkkweye? Pa inge sie inkacnek wo kom kuh in muhtwacwacack kac:

1. Orwacclah sie tahk ke mwet kom luhngse. Elos kuh in mempucr ke sucu lom sifacna (somla kuh ingena), kawuck, Mwet kol ke Alu uh, kuh mwet lun ma suhmuhslah uh.

2. Suhmuhslah ohiyac lalos ma kom luhngse an. Kuh ninac kiyom ah mongfihswacs na pwacye? Sahp kawuck se lom kuhlwacng nuh sin mwet sahyac. Sahp kom luhngse puhlaik lal Kacptin Moroni ah.

3. Sulaclah sie ohiyac wo ke tahk lom an ac siyuck sum sifacna, “Kuh ngwac kosracni fuhkah ke ma wo se inge? Meac nga enenuh in oruh in ahkyohkye ma se inge ke moul luhk uh?”

4. Suhmuhslah plwacn lom in ahkyohkye ohiyac wo se inge ac fihliyac ke sie acn ma kom ac kwacna liye kac an, in ahkacsmakihnnye kom ke mwe finsrak lom an. Pruhe siyuck ke kahsruh luhn Pahpah Lucng ac liye lah fuhkah orwacclah lom an pacl nuhkweya. Pacl se kom puhlah muh kom ahkfalye fal ke ohiyac wo se inge, kom kuh in sulaclah sie ohiyac wo sasuc ah in oruh kac.

Esam lah ke kuht ahkyohkye ohiyac wolacna lasr sifacna uh, kuht tiac ahkfuhlwactye muhkwenah luhlalfongi luhn mwet mahtuh lasr ac kihsackuhnlah elos oraclah, tuh kuht kuh pac in sang kuh na wo nuh sin elos suc raunikuhtlac.

TUHLIHK SRIHSRIHK

Kom Payonir se Pac!

Payonir pa mwet suc ahkolah inkacnek nuh sin mwet sahyac in ukwe.

Sruhwaclah sie petsac kuh konwacack sie petsac ke mwet mahtuh lom ah. Kuh kom kuh in konwacack soko sramsram lah elos ahkolah fuhkah inkacnek nuh sum in ukwe? Suhmuhslah luo ohiyac kom kuh in ekihn sie payonir mihsenge kac an. Kom kuh in akacsruhi nuhnak lom an ke ekuh in toeni luhn sucu lom tohkoh an!



Luhlalfongi, Sucu,
Kahsruh

Kuhiyacsr ke Ohiyacn Ninac ac Pahpah

Pruhe in luthutkih kuhfa inge ac suk in etuh ma in akacsruhi kac. In etwacalah ke "Sucu: Sie Mwe Fahkwack nuh fin Facluh" ac ahkyohkye fuhkah luhlalfongi lom ke God ac ahkinsewowe fuhkah mwet suc kom liyacacng ke forfor luti yohroh uh? Nuh ke kuhtuh pac ma in etuh, som nuh ke reliefsociety.lds.org.

"Sie ma yohk srihpac tuh nguhn luhn tuhlihk nuhtin God oasr ke elos isuslac ac sie pacl wowo in kapkapwack ke moul ma pahtpaht," lutiyuck sel Elder Dallin H. Oaks ke U luhn Mwet Sap Singucul Luo. "Ke kahlwem ke sahflahiyacn ma yohk srihpac ke plwacn wolacna ke engan, nga luhlalfongi lah sahflahiyacn mwe kahsruh fin facluh ac inkuhsrao uh pa tuhlihk nahtuhsr ac mwet lasr uh."¹

Elder Neil L. Andersen ke U luhn Mwet Sap Singucul Luo el fahk:

"Kuht luhlalfongi ke sucu, ac kuht luhlalfongi ke tuhlihk. . . .

" . . . [God el] fahk [nuh sel Adam and Eve], Kowos in isus fahko in pus, tuh fwilin tulik nutuwos fah fahsrelihk nu fin faclu nufon ac leumi ma inge' [Genesis 1:28]. . . .

"Masap se inge tiac kuh in muhlkihnyucklac kuh srisrilac nuh sahyac ke Alu luhn Jisus Kraist luhn Mwet Luhlalfongi Lal ke Lwen-sahflah."²

Tuh tiac kuht nohfohn tuhkuh ekihn pahpah kuh ninac se in

moul lasr, kuht kuh in tuhfaflah tuhlihk ke oacna sie matwac. Kuht engankihn mwe insewowe in ip ke sucu lal Pahpah Inkuhsrao, ac kuht puhlakihn engan ac mwe srihke in sie ip ke sucu se fin facluh. Ac nuh sin mwet puhs, ninac ac pahpah tuhpanuhlos ke moul wacngihn sahflah kac ingo.

Tahfweyacn Ma Suhmuhsrah

Psalm 127:3; Matthew 18:3-5;
1 Nephi 7:1; Moses 5:2-3

Sramsram Moul

"Puhsra puhkantwen fin fac-luh mihsenge ahksrihkyelah yohk srihpac ke in oasr tuhlihk nahtuh uh kuh ahkkahlwemye tulokihn kuh ahksrihkye pihsen tuhlihk ke sie sucu," fwack sel Elder Andersen. "Tuhlihk muhtwacn nuhtihk uh furohkma nuh sihk ingena ke sie ma sihmlac sin sie ninac Kristin (te ke luhlalfongi lasr uh) nahtuh tuhlihk limekohs. El fahk: '[Kapkapwack] ke facsin se inge, upac na pwacye in eis sie nuhnac ke pwacpuhl ke ohiyacn

ninac uh. . . . Tuhlihk uh kapkapwack ac ten liki college. Pwacye in oasr ten likina kena in forfor facluh uh. Ten liki kuhin tufoklac ke fong ke pacl mwesahs lom uh. Ten liki ahkwoyeyacn monum ke gym. Ten liki oacna sie orekma kom kuh in eis kuh finsrak in eis uh.' Na el sifil fahk: 'Ohiyacn ninac se el tiac mwe pwacr se, kunohkohn se. Kom tiac orwacni tuhlihk uh mweyen kom konwaclosyak tuh kahto likina ma sasuc uh. Tiac ma na in oruh se ke pacl mwesahs lom uh. Pa ma God El usot pacl uh nuh sum kac uh.'"³

MWE KAHSRUH

1. Dallin H. Oaks, "The Great Plan of Happiness," *Ensign*, Nohfuhmpuh 1993, 72, 75.
2. Neil L. Andersen, "Children," *Liahona*, Nohfuhmpuh 2011, 28.
3. Neil L. Andersen, "Children," 28.

Nuhnkuh Ma Se Inge

Ke inkacnek fuhkah ma sucu lasr fin facluh el oacna sucu lasr inkuhsrao uh?